

光緒山西通志

仕實錄五

錄六之五

山西通志弟百四十九

賜進士出身頭品頂戴兵部侍郎兼紫院右副都御史巡撫山西提督軍務張煦奏
旨監修

國朝 順治

羅熿字鏡初清源人前明戊午舉人授延川知縣崇禎中土
寇披猖所在悉被焚劫孤城受圍熿訓練民壯誓眾死守城
獲保全歷升戶部主事兩淮運判遷守滄州

國朝順治初擢戶部員外郎轉郎中出爲西甯僉事甘鎮久
不靜熿撫邊民懷西羌始得晏然生平溫和謙讓處已儉約
動持以禮遇里中不能婚葬者輒資助邑人咸仰之

裴希度字晉卿陽曲人前明甲戌進士授堂邑知縣時值奇
荒兼有賊變實心撫字民賴以安行取工部主事擢御史巡

山更記卷一 四十一 金三
視南城務持大體不沾沾訐人陰私會鬪賊東渡母范歸里而太原卽爲賊陷母殉難別墅井中希度痛念母節乃捨別墅爲報恩寺

國朝起爲通政司參議轉太常寺少卿致仕歸卒所著有澹明野嘯息齋藏書等集

李家選陽曲人前明丙子舉人懷慶府推官順治初就升知府單騎入太行招土寇范以忠鄭國安等胥令復業又請題豁所屬逋賦二十餘萬懷民德之獲

賜蟒緞及袍帽鞍馬擢湖南道卒

王吉人字櫟菴清源人由副貢知蕭山縣兵火後白骨破野城無居民餘寇未靖於是選壯丁授方略諸賊以次就擒招徠流亡俾各復業繕完城堡興修學校政聲大著尋遷蘇州

府同知縣人建祠以祀刊實政紀略再補揚州掾知常州府旋以積勞乞疾歸

胡揚俊字甸方交城人丙戌進士知商邱縣調邵武所至以清直聞商邱大姓某以事訟繫經年一詔卽察其誣立出之獄某密具千金爲壽怒斥之曰吾雪冤非爲私也何得遽以汙我卒以嘔強忤上官罷歸四壁蕭然日用不給處之宴如牛光世清源人舉丙戌鄉試歷任蒲州霍州學正遷饒平縣知縣慈祥愷悌多善政饒民勒石建祠

王灝儒字心孩丁亥進士授曹州知州州承明季之亂多豪猾難治灝儒內嚴守備外示撫綏反側漸安逃亡復業境內肅然甫一年解組歸仍閉戶讀書著有四書音辨及清源志

稿

劉祚全徐溝人由戊子舉人授含山知縣有惠政後值三藩之變奉檄晝夜剿防以幹濟稱

劉茂桂清源人由副貢任舒城知縣嚴毅勤敏凡利害所關於上官前抗顏爭執強直有古人風

原明田興縣人少有遠志凡天文地志河防農政諸書多所究心舉順治戊子鄉試授保定府推官以廉正內擢工部屯田司主事遷營繕司員外郎奉

命督淮徐河道會河決黃家嘴直灌沐陽海州等處明田日夜露處率屬搶築比工竣宿遷又決明田以南隄旣保固桃宿北岸舊隄多卑薄因議於桃源黃家嘴並洛馬湖徐昇壩等處皆堅築重隄置守如南岸工成稱

旨將大用矣而以在工勞勩致疾告歸家居十年而終

魏震榆次人已丑進士授府谷知縣行取刑部主事歷員外郎中出知濟南府小心清潔每事必親決不以假人弟霆少與震俱有名以拔貢任高州府通判撫養窮黎結猶獍以恩信於鋒刃之下活無辜三十餘人

常大忠字二河交城人壬辰進士銓梓潼知縣補潛山履畝清丈計田編里俾里役無贏縮建三立書院買學田創庫樓立眺臺擢保定府同知郡有楊忠愍祠朔望必往拜重修旌忠祠建忠烈祠祀甲申盡節諸臣無何病作聞完縣大祲亟出囊中二百金賑之不三日卒櫬不能歸衆賻之乃獲啟行潛山保定人胥懷之

孫象賢字踐猷興縣人乙未進士初授中書舍人出典四川鄉試得人稱盛旋督九江關樞淮徐糧漕厯職清慎所至剔

上卷一百四十一
七
三
奸蠹賑饑荒貸逋欠人稱其惠康熙初擢刑部郎三年以憂歸尋卒

鄭崑璧字崙輝文水人祖死於閩父亦殘廢崑壁刻意讀書舉甲午鄉試戊戌成進士授富平知縣縣南漆水沮水金定河北溫泉胥可灌田崑壁相形勢高下疏支渠濱河地胥爲沃壤編審均覈里胥無得上下其手緝盜捕逃井井有紀行取兵部職方司主事同考丁未會試旋督榷揚州鈔關開啟閉以時抽掣盡然吏無得中飽轉員外郎郎中出爲湖廣學道楚地遼闊時歲科分試值吳逆之亂衝兵鋒徑前獲竣事而疾遂滋甚歸數年卒

以上太原府

衛周允曲沃人前明甲戌進士授金華府推官行取四川道監察御史順治元年五月

大兵定燕京授原官巡按真定順德廣平大名四府九月疏
薦明吏部尙書傅永淳湖廣巡撫王夢尹等均下部錄用時
畿南州縣正官多缺地畝荒蕪百姓流亡周允請於現任教
職佐貳及原任知縣中選補並急推巡撫以資彈壓選道府
以重地方又請清查錢糧實數俾官吏無蒙蔽百姓免代賠
其遭兵火災荒諸縣蠲免錢糧皆從之二年山西孟縣土寇
崔思享韓嗣昌等倡亂勢延直隸平山周允檄井陘道邱龍
華發兵勦捕並請

勅山西巡撫督兵會勦漳滏諸河泛溢所至壞城垣沒田廬
蠲其租賦並酌復畿輔守城兵以備賊盜又言去冬州縣因
辦兵差派民供草豆卽抵應完錢糧宜畫一以免浮增真定
駐兵六千未必俱實宜裁虛報加給現在諸兵疏入俱議行

差滿同京掌河南道事累遷大理寺少卿母憂歸服闋補原官十年擢工部右侍郎調兵部時逃人例嚴州縣奉行不善株連滋累因陳時事五款如嚴兵行紀律定招安事宜禁武弁濫準詞訟革驛站濫派索費類皆事要其於逃人則言隱匿之罪例當分明凡自盛京隨來者曰東人自順治元年至今投充者曰旗下人本自有辨匿旗人與東人當有別又出京與在京紳士誤犯與平民犯者均當有別尤爲深切著明疏入卽下部議行會堂司以他事得罪牽連鐫級移病歸周允少孤與弟周祚皆憤起艱難刻苦淬厲性簡重臨池散帙外無他嗜好歸田後築園室西優游以終

宋調元字端石洪洞人由丙子舉人授任邱知縣擢福建道御史巡按淮揚有循聲調元居家孝友明末流寇之亂捐金

守城保全有功

李怡字婉如太平人舉前明丙子鄉試順治中宰休甯務以德化士民頌之善書工詩康熙初告歸優游林下以終

衛周祚字文錫曲沃人侍郎周允弟也舉前明丙子鄉試第一丁丑成進士授永平府推官剔奸釐弊克舉其職遷戶部主事歷員外郎郎中會亂棄官歸

國朝順治元年起前官改吏部考功司郎中調文選司遭父憂侍郎金之俊議假治喪一月卽出任事周祚具疏乞終制允之服闋仍補文選司郎中銓政叢弊明季尤甚

國家一舉而廓清之內外注官成法肅密每由部歸邸舍輒閉戶謝絕請託嗾者假他事造蜚語中之旋白擢太僕寺少卿尋遷刑部左侍郎改吏部督工部尙書董修

三殿經畫句稽釐然有紀省內府金錢數十萬工竣
賜御筆山水圖暨雕鞍駿馬以旌異之歲祿奉

命往賑畿南斂散給授措注有方賴以以全活者甚眾以勞
加太子太保進少保戊戌調吏部尚書尋授文淵閣大學士
兼刑部尚書明年以奉職勤勞加少傅兼太子太傅充會試
副考官明年晉少師兼太子太師

聖祖仁皇帝踐阼復充會試副考官時改內閣爲內三院會冢
宰缺

命以內院大學士署吏部尚書事康熙二年請假歸葬兄周
允明年還

朝充武會試正考官六年充

世祖實錄總裁官八年三月以疾請歸

命馳驛回籍仍准支俸辭不允十一年

特諭馳驛來京授保和殿大學士兼戶部尚書未幾疾復作再疏乞罷

詔原官致仕仍馳驛回籍予俸十四年三月卒

子祭葬謚文清生平在職清慎勤練於國計民生利病知無不言在刑部請嚴反坐之律復收贖之令定議功之典在戶部請復各省鑄錢之制俾貨泉流通民用益裕而官吏部選曹最久於銓例條分縷析雖老吏莫能欺其再入相也值肇舉經筵日講請令講官于尚書大學衍義貞觀政要諸書擇其最切者抽繹闡明以資治理又請各省纂修通志舉天下地理形勢戶口田賦風俗人才物產彙輯爲一統志以備循覽

上皆嘉納之及歸甕無餘資儉約如儒素瘠田數十畝老屋數椽僅蔽風雨其後大學士馮溥告歸

上以周祚居鄉謹厚若未經顯秩者特舉以

諭溥云四十二年

上西巡駐蹕曲沃遽丙大臣酌于墓

諭有司存撫其孫尋入祀賢良祠子台瑞以蔭官至潼關道副使

王岱曲沃人由己卯舉人授隨州學正歷升海陽知縣修城垣建縣治興學校人士愛戴祀之韓陸二公祠

王錫隆字爾巖翼城人事母孝與兄友愛領前明己卯鄉薦順治中授甯海知州招撫流亡弭戢強暴清畝數廣丁額兵燹之後民氣爲蘇尋擢刑曹由郎中出爲湖北僉事禁鬻索

均協濟以蘇驛困嚴包棍疏引票以清鹽政商民咸受其賜
入覲時詳陳利弊奏免部取綾紗紙張數百萬尋以母老乞
養歸築十畝園徜徉二十年卒

常星景字象台翼城人由前明王午舉人知陝西隆德縣勸
農課士百姓依之如慈母擢吏部主事奉公守職不附權要
罷歸日中端坐而逝

張錦字文伯翼城人王午鄉薦順治中授涿州知州當三
路之衝地荒民疲錦多方招徠民始復業旋擢部郎理刑獄
涉羅織者概從輕典全活甚衆升霸州兵備治兵嚴肅不爲
民擾霸人建祠祀之解組歸優游林泉者幾三十年著有六
果園文集

賈漢復字膠侯曲沃人明季從督師李建泰官副將

國朝順治二年豫親王南征漢復詣軍門納款隨入都隸正
藍旗漢軍補佐領累遷工部右侍郎十四年改兵部左侍郎
巡撫河南明年疏報墾田七萬二千餘頃每歲增正供四十
萬八千餘兩

上以其實心任事下部優敘加兵部尙書銜是歲以黃河復故
道請更正驛路以寬豫中之偏累又以河南無漕運邊防請
裁各衛所併入附近州縣皆下部議行十六年正月大兵進
取滇南解銀四十萬充兵餉議敘加太子太保八月海賊鄭
成功犯江南警連河南境漢復遣兵援勦敗之土賊楊玉環
等劫獄散割賊衆復遣兵討平之尋以事干吏議革雲騎尉
世職留京候補康熙元年補授陝西巡撫奏復兵丁月米並
增驛站銀兩先是順治丙申河流東徙韓城河壩田開墾升

科後復衝沒爲奏免其賦又以暇出俸金補刻石經鑿通雲
棧浚龍首故渠修蒼龍大嶺秦人頌之七年召回京未及補
官卒

賜祭葬如例漢復好交游重然諾知舊多藉以舉火尤喜文
學幕客多當代名流嘗修陝豫兩省通志解官入都過里門
設社倉義學在都于達官貴人來者或踞牀高臥而坎埒侘
傺土輒擲千金如涕唾一時咸多其義

王佐翼城人前明壬午舉人順治初知石首時境多亂民滋
擾佐辟首惡逐餘黨日行荆棘中勸農商旅復通行取雲南
道監察御史巡按湖北陝西卒

陰應節字雲礎洪洞人丙戌進士知潯化縣行取工部給事
中終刑戶左右給事中應節少負氣節蒞潯化邑苦寇患督

鄉勇勦之爲給諫疏陳吏治財用刑名三事及請嚴核卓異
又發桐城方氏舉場賄鬻弊後例轉官仍留任以危疾卒于
邸舍

劉早譽洪洞人志行孤高不逐時俗登丙戌進士任莘縣知
縣守城殲寇積勞成疾卒

許元卿字天礎曲沃人舉丙戌鄉試歷任平定州遼州學正
陽城教諭殫于其職升長葛知縣專心撫字不事催科去之
曰士民攀轅哭送者六十里不絕閭數十年邑有客長葛者
猶問父老謳思不置云

秦廷獻字和璧曲沃人以副貢任中書遷戶部主事歷員外
郎中山知惠州府時軍務迭興廷獻加意拊循歲省費巨萬
至于培人文正風俗杜誣告御餽遺惠之民皆勒石歌頌之

薛鳳鳴翼城人由歲貢授盤屋知縣民有利病興革不少懈時叛黨金龍等肆抄略爲邑人害鳳鳴抵其巢開誠撫諭龍等感泣願就約束境內晏然

崔永祉襄陵人以歲貢知扶風縣再補英山招撫流亡開墾荒蕪多惠政升延安府同知改開封府卒

周自新洪洞人順治二年以太原守備從大軍征剿有功調駐高唐州移軍濟南合勒禹城平原諸賊斬獲甚衆又勦平益淄等處及十八盤賊敘功升松江提標都司歷任有聲屢著戰績卒祀忠義祠同時楊天奇以武舉官至廣西都司亦屢建奇功

劉緝堯字虞上曲沃人丁亥進士歷官浙江紹台巡道時海氛未靖有陳文達者素通寇勢張甚緝堯招降其衆安撫得

宜其他善政甚夥台人作三台異績記頌其事子殿邦任兵馬司指揮

劉佐世字佑君曲沃人嘗徒步數千里至閩迎父輓歸戊子舉于鄉銓高平教諭力新廟學庚戌成進士知霍邱縣民多質子女自活踰期輒沒爲奴婢爲立禁計傭值定歲月遣還以病歸

符執桓翼城人由戊子舉人官新喻知縣當兵燹後走田間勸無主遺賦詳請豁免流民復業給牛種又分粟賑之而以其暇治衙署吏舍鋪房平道構梁雅得泊體屢入薦剡尋卒識者惜之

王廷議字文二翼城人己丑進士授清澗知縣招流亡鋤豪強以卓異薦遷戶部稽吏司主事凡旗丁霸田產者概不查

題以經濟薦遷紹興知府蒞任三月因前官註誤降鹽運司
運同著敬慎齋遺集存于家

王廷諲翼城人副貢由蔚州學正升清江知縣捐俸修學宮
葺河隄卓有政聲遷綿州知州卒于官

鄭明良字廣颺太平人壬辰進士除華亭知縣甫下車卽有
編僉徭役之舉滌除煩苛民感其惠刊石頌之

王煒洪洞人由舉人任昌黎知縣政簡刑清革除夙弊捐俸
辦喜峰口軍需建滦河橋梁催科有方蝗不入境民愛戴之
張麟化字潛初翼城人已亥進士授重慶府推官康熙中缺
裁改補紫陽令建文廟革私派清讎累循聲丕著吳逆之變
棄官入紫金山民皆衛之亂平上官疏薦于

朝辭不赴

徐宏先臨汾人由丁酉舉人官內閣中書歷刑部郎中與修律例辦秋審多所平反終于鎮遠知府

王紫生字映薇洪洞人戊戌武進士官福建泉州守備耿藩造逆約海寇內犯紫生方奉軍檄外出聞變急反而城已陷爲賊將所獲脅之降不屈賊愛其才不卽殺囚于泉州獄明年官軍復泉州得脫提督段重其節檄爲行營都司會段戰死而紫生囚賊中已病遂辭歸

王大作字蓮子曲沃人幼負奇氣視儕輩低頭緩步輒笑不自禁與人交死生患難不相負由己亥進士知涪川縣當開報大計部民某來謁某得幸上官視藩臬如僚友大作出據案坐目直上視召某入某長跪候起居訖麾之去左右大驚大作不屑也涖涪川十年復流民七百餘家實市廛三百餘

戶墾田一千七百餘頃省義助銀七千五百餘兩入爲行人
司行人以老病乞歸臥見山樓中撫石樹梅以終身著藥言
鐸書藏于家

袁舜蔭字涵一翼城人己亥進士授梧州府推官康熙中裁
缺補隆德知縣請除荒地糧二百五十頃減鹽引八百有奇
民用始蘇改補商城值歲大祲捐俸煮粥活者甚衆及歸囊
橐蕭然

李質素字文華翼城人辛丑進士除河內知縣以廉惠稱行
取去官懷民祠祀焉由兵部主事累遷郎中督學廣西有聲
邑有薛士麟者倖粵劾于官遭孤飄泊攜以歸教養之家居
時聞友人宗某客死陽城爲經紀其喪舁歸以葬林下十餘
年惇篤好禮邑人咸欽其行魏敏果公贈以詩亟稱之

李廉士字砥澗曲沃人戊戌進士授金華推官以書法名一時康熙癸卯分校浙闈所取皆知名士性慤直忤上官意遂拂袖歸

衛聖疇洪洞人由庚子武舉歷福建連江營游擊從勦耿逆以戰功累擢台灣水師副將告歸濟貧恤困善行基多邑人稱之

郭鞏洪洞人已亥進士知連江縣平易體下清白自守尋遭耿逆變憂憤成疾卒於任

高鵬起字搏九曲沃人爲諸生與兄鳳起並爲督學袁袁山所獎嘗賦詩以贈舉順治丙戌鄉試辛丑成進士署馬邑縣教諭改萬載知縣獨遭賊招流亡而感袁山知己之雅撫其妻暨孫尤篤致政歸著應世篇傳世篇晴園文集藏于家風

起字羽伯亦以進士官龍游知縣

樊疑字九崑臨汾人性狷介從學辛復元之門以貢授盤屋知縣崇教化抑奔競未幾以事罷去百姓爭相餽贈疑不受飄然歸里吟咏自適

蔣吉人字獻亦臨汾人仕爲內黃丞值旱荒盜蜂起協令捍禦屢挫賊鋒兵後疫癘復作捐棺槨瘞死者又施藥賑粥遺黎咸感其惠遷易州判官亦著政聲

高暉字蒼巖襄陵人忠節公子也戊戌進士授曲靖府推官歷遷蘇州府知府剏繁肩鉅以精勤稱卒于任少與兄曦讀書村墅專一至忘寢食才名並著曦字寅初由進士官寶雞知縣

喬運閔字良夫襄陵人以貢生歷崞縣黎城教諭遷東安令

勸民開墾教習紡織西山寇起同武弁勦平之捐俸建書院
躬親督課一時人文蔚起解組歸設義田以贍族乙亥地震
發粟數百石賑之卒祀忠義

成躍龍鄉甯人以貢授潮縣知縣調登封勦平土寇招撫流
民勸農課士政教大行遷兵馬司指揮去民思之祀名官

沈逢泰字爾亨襄陵人事繼母以孝稱與弟雍睦終身設義
學多有成就官代州學正課士有方佐州牧平政爲當道所
重卒于官祀名宦

王璽字震之洪洞人父朝望明光祿寺署丞罷官客濟南灤
上置佃僦負奇氣喜交游家故饒于財食客常百餘人以技
擊角逐爲樂海寇倡亂璽欲立奇功約客走浙閩助官軍擊
賊父故端謹士聞之怒罵璽室中而出金徧贈客令散去客

得資則偕至海上適官軍與賊戰奮呼而前陷其陣官軍乘之賊大潰帥欲請於

朝官之辭與金帛亦辭問所欲則同以願歸功故主王璽爲言帥乃飛騎迎璽自灤置麾下督諸客爲前鋒每戰克捷積功授山東參將諸客各授職有差璽歷官江甯總兵年四十餘卒

以上平陽府

王含光字表樸猗氏人前明進士授行人自其祖父三世登第皆授此官鄉人異之順治中以薦授禮部員外遷吏部郎中出爲河南按察使居官清慎終始如一工詩並精繪事

世祖特賞之

賜御筆山水一軸異數也歸里後慕山巨源似仕非仕築似園居之著易學三述易圖直解谷口詩集行於世子密儉俱

官至監司

荆世爵字從修猗氏人前明庚辰進士授諸城令歷臨清州知州順治中補大理寺卿巡海道備兵甯紹值海寇猖獗大軍南征造戰船購糧芻經畫裕如隨同勦舟山寇有功遷河道副使克勤其職終任無潰決患謝病歸卒于家初諸城民劉度者得罪巨紳將置之死世爵特豁之度感次骨及涖臨清隨之行遇寇度力匿之賊縛度于柱炮烙至體無完膚終不肯言世爵處竟以獲免

杜篤祐蒲州人前明丙子鄉薦順治初歷給事中辛卯典試山東累官戶部侍郎左都御史加太子太保康熙九年夏大早上言請停徵直隸山東錢糧嚴飭督撫諸臣清理獄訟審擬從公勿縱貪吏抑小民以迓天和又疏請勤講讀以佐典

學皆稱于時

田厥茂字心耕蒲州人丙戌進士累官福建右布政卒于官
厥茂所至有聲績嘗督學陝西號爲公明復建正學名臣祠
春秋飭豆邊惟謹又考覈忠臣金侍御毓峒黃憲使綱吳明
府從義節婦晉氏朱氏聞發幽隱秦人尤稱道之

喬震蕃字篤生猗氏人丙戌進士授鉅野令裁革羨銀陋規
請減河夫差役己丑五月曹縣賊李化鯨倡亂連破定陶武
城東明諸縣乘勝圍城震蕃勵士民悉心守禦令四門各置
大礮十餘注以水賊火門急傾水得熄城垣爲礮毀土礮堵
之被圍三晝夜賊百道進攻皆應機而拒總河楊上其功部
議中格獎敘不及以疾歸尋卒

賈滄蒲州人順治初以拔貢任蠡縣知縣在官四載力除宿

弊爲蠹人所懷及卒貧無以治喪蠹人爲之賻贈始克歸葬
趙之璿字子璧樂河人順治初以拔貢知沈邱縣縣故有里
長司徭役爲編氓患號世里長下車首革之大猾某殺人而
匿其尸于蘆感異夢得諸城南立置諸法擢郴州知州甫數
月解組歸嘗自號瘡足以見志之璿內行篤而書畫尤工人
多什襲弄之

尙昱岐字戴公虞鄉人戊戌進士除漳浦知縣值明季田多
荒蕪昱岐按圖籍招流亡剔晰積弊正供無虧鎮海泉州二
衛多逋賦出俸代完民懷之競相勸勉職滿告歸卒著有詩
集

陳適度猗氏人壬辰進士授江甯推官再調邵武清慎平允
每決獄夜必焚香告天自矢邵武民何承福爲賊所誣廉其

冤釋之何餽千金卻不受著審錄八冊多所平反歸田二十餘年廉靜自守布衣策蹇寒素如諸生遇者不知其爲鄉先生也子德愚歲貢德魯由舉人任平定州學正

謝敦懿臨晉人乙未進士知玉山縣再補臨湘時土賊李來亨據房竹西山官軍勦之檄令運軍食五百石又戰鑑二十艘符下皆咄嗟而辦不愆于期一時稱才吏內遷主事遭磨疾卒年僅三十二時論惜之

張含瑾蒲州人幼端疑有文望補潼關衛諸生舉陝闈丁酉鄉試己亥成進士除建昌府推官性勤敏檢視案牘夜分不少倦讞鞫以片言折之咸讐服大豪黃某睚眦殺人捕置于獄暮夜餽千金祈少緩不許卒置之法康熙丁未裁缺改陽春知縣縣介萬山中匪黨嘯聚率鄉團親搗巢擒其渠城守

某弁激變兵士洶洶單騎入營諭以禍福皆解散以艱歸服
除補宜興縣甫兩月以病乞休家居十年杜門卻軌文學爲
一時祭酒卒後建昌人祀之盱江書院以上蒲州府
楊四重字凝之壺關人明崇禎戊辰進士授宜陽知縣調洛
陽以最擢南京御史巡視江漕多所獻替甫得代而值國變
微服歸里

國朝徵授江西道御史督理漕儲未幾解任卒所著有柏林
徵獻錄弟四易字會之順治間由歲貢授固城知縣兵後開
誠撫字流亡歸集田野盡闢遷松江府同知以疾歸

周再勳字仲賜長治人前明丙子舉人順治二年授刑部司
務與修律例升戶部主事督餉密雲以勞遷員外郎尋擢金
華府知府兵燹之後事務生聚民咸德之以老乞歸性好學

工書善繪事嘗續修郡志子培誅己丑之變再勦被圍高平同弟培翼馳往突圍入城父子登陴固守四十餘日圍解以貢任平定州訓導著有詩集培翼亦由選拔司訓五台著有西征雜詠

馬瑾字公瑜長子人丙戌進士任句容知縣捕巨盜審奇冤民有青天之頌未幾卒橐無一錢上官憐之爲賻贈歸其櫬祀名宦祠

李中白長治人丁亥進士由翰林檢討遷內院侍讀學士性和易雖少達居鄉處友一如布衣主辛卯順天鄉試精心甄校所得多名士後以病歸里就醫江南至杭州卒子璋貢生工詩賦有奉宜集

閻必卓字仲立長治人辛丑進士出宰平陰地荒蕪民多逃

亡加意撫綏遇歲祲力請賑濟躬自量給先是各里有大門頭之役又歲派挑河爲民累白于當事悉除其弊民大悅甫二年卒于官著有秋谷詩文集

趙良玉字爾栗長治人以歲貢選猗氏教諭遷大同府教授歲饑與有司設法分賑民惠之擢知太平縣以兄喪不赴歸築序樂園課子姪讀書優游十餘年卒

王鎮寰平順歲貢由洪洞訓導擢西華知縣邑經殘敝加意撫綏招流移勸開墾民漸安集向有例餽里金數百嚴拒之有盜案經二十八勘未決實巨窩積猾也鎮寰獻得其實立定爰書民稱快焉以河工罣誤去官華人思之不衰以上潞安府張煊字葆光前明戊辰進士安邱知縣累官河南道御史大學士陳演有所屬託不從爲所誣下獄遣戍尋赦歸里

國朝順治元年以薦授原官母憂歸服闋補浙江道御史仍掌河南道事疏言言官劾人乃其職守卽有不實勿遽下獄對理又言近以武職改任督撫恐政體民瘼未必曉暢請還本職以全器使貪官被劾雖遇赦免罪仍當區別八年劾吏部尚書陳名夏十罪兩不法爲譚泰所誣論絞死未幾譚泰以罪誅明年正月

特旨昭雪贈太常寺卿

賜祭葬錄其子其遠如所贈官後至禮部侍郎而其時名夏爲大學士甯完我劾奏奸狀鞠實以絞死

劉昇祚汾陽人前明丁丑進士順治初官湖南道駐辰州明桂王復陷常德遣將四略昇祚設守禦甚備擊卻之已而其將李錦以衆數萬至昇祚據甲登陴指揮禦圍益急援絕

城遂陷昇祚大呼巷戰死事聞

贈光祿寺卿蔭一子入監僕溫虎亦從昇祚沒於戰

王廷伊字嚴介介休人由舉人知信陽州艱歸後知商州招撫流亡續修州志內遷兵部員外轉郎中典已酉廣西試擢瓊州道次巡查檳榔規例瓊海稱之以繼母艱歸卒

霍焜字岐望孝義人順治中由舉人授馬湖府推官旋署馬湖及敘州府知府十八年明裔朱奉鎔作亂二府俱新闢無城守焜率家人奮擊身受重傷子垣陷敵死卒設方略擒斬奉鎔並餘孽以功遷員外郎督領關稅務轉兵部郎中出爲川東道升湖廣布政使參議卒著有采木末議巡東泊書史論孝義人幼孤發憤力學舉前明壬午鄉試明年成進士順治中薦推御史巡按江南福建兩省嘗按臨惠安令某素

貪酷公署鋪張費三萬餘金冀以賄免詒入境卽劾罷之有
同年某餽黃白酒各一器啟視之皆黃白金也反金記過嘗
自矢曰枉法要一錢不得渡江歸世稱其廉

任長慶字雲石石樓人乙酉拔貢授中書舍人歷工部郎中
遷淮安知府補鳳陽道改臨洮道卒于官長慶精心計有膽
略任中書時值姜逆之變大兵來討請從行恢復多有贊畫
在工部榷蕪湖稅以廉潔著兩涖道臣事胥得憲體著易解
藏于家

梁才傑字廷標介休人丙戌進士任福清知縣多惠政士民
懷之致仕歸子鍾豫已亥進士令常泰卒于官

師佐字靖公永甯州人壬辰進士知福甯州招流亡嚴差沒
爲文以驅虎患民立祠祀之遷蘇州府同知釐漕蠲除陋規

嘗言百姓省一釐旁費則完一釐正供督撫兩疏薦焉

梁梗永甯州人戊子舉于鄉授新甯知縣巨盜林亞祐者盤踞百峰山爲營弁所擒繫獄中梗到縣上官檄令並其黨五人悉按誅梗研訊乃開平人林亞友友祐聲近誤執以爲盜首爲申辨往復十有七次乃得釋時濱海諸縣方報墾沙田計畝升科梗僅以六百畝應巡撫怒梗曰職不敢圖一己之功名貽萬年之大害巡撫稱善奉檄采柎木鄰縣有以五株費至六萬金者梗以新甯民貧不能堪亦力請獲免

曹席珍臨縣人舉戊子鄉試康熙中知竹谿縣城毀於獻賊之亂官弁分居山寨席珍至始入縣治事建臺設礮石弓矢以備不虞居十一年遷知彝陵州未行而鄖陽諸鎮叛附吳逆營弁馮某約俱通款席珍叱之馮怒率眾急攻臺垂陷會

秦兵至始舍去而叛將洪福方窺興元取道竹谿席珍乃移據中峯觀扼賊要路賊併力來攻厯四旬大小數十戰弟傑從子啟東及家僮張永祚楊真等力鬥死賊將馬更奇將登觀手發大石擊之立斃已而賊焚觀樓樓燼闔門遭屠戮婦女二十餘人相攜投崖死席珍復上中峯絕頂靈官廟據險以禦不食已二日從者猶四十餘人至是悉爲賊殺力竭被執乘閒脫走白土關投遊擊余某而余已叛復執以予賊乃送之房陵行至上庸驛題絕命辭於古廟壁旣至將殺之忽傳吳逆命釋放安置撒海堰採豆花水芹而食踰二年大軍進剿賊夜遁席珍首謁軍門總督蔡驗得拒戰狀令待命樊城尋辭歸其後部檄起職以年老不復出

高首標永甯人已亥進士除廣昌知縣母憂起復補陵水尋

遭父憂歸再補官復令廣昌時耿逆方叛其將劉汝桂甚猖獗首標單騎詣其營曉以大義汝桂心折解甲歸降廣昌旁州縣胥復準軍功例加五級尋以廉能行取吏部主事疾卒于道旅櫬久淹會鄉人于清端公成龍總制兩江乃獲歸葬

以上汾州府

荀肸字叔康澤州人前明壬戌進士授戶部主事歷陝西參議湖廣荊南道改全楚監軍守襄樊護承天陵寢並有功鄧玘軍變撫軍盧象昇檄肸士汰治之皆帖服無敢譁者擢鄖陽巡撫剿寇荊州與中樞楊嗣昌相忤爲所中逮戍

國朝順治二年起授南贛巡撫時江西叛服無常贛州亦未入版圖總兵柯永盛金聲桓方進兵會剿肸士請以一師守南昌一師至贛州合諸營悉聽節制方銳意規復會疾作卒

石鳳台字翥雲陽城人前明乙丑進士授韓城知縣調停驛站民力獲紓歷任關輔兵備大兵平定秦省首署巡撫保全省城寬嚴相濟百姓賴之

張京字綠雪澤州人前明辛酉舉人知高陽縣浚河承矩淀乘城守禦城獲全順治初擢當塗知縣食脫粟飯什物胥胥互告折獄無冤民畏服之輯讞語爲琴餘錄行取二科給事中劾巡方三御史不職御史銜之噤論當塗劾代不清赴質無左驗坐誣者罪還京官尋罷巡方御史蓋權輿于京也

李藻字鑑明陽城人前明辛酉舉人知保定縣調大城已而知涿州所至皆有政聲擢兵部職方司員外郎以知兵稱遷遵化監軍道屬弁陳錮金饅中詭以蜜進立糾之不少假調湖廣沔陽道國變棄官將歸浮沈楚地

大兵南下聞其才委署湖廣按察使兼武漢兵備道尋授辰
常僉事道厯順慶參議襄陽副使以卓異內升太常寺少卿
在順慶時方鎮闢試士賊忽擁衆至諸生洶洶將散走同官
錯愕藻時爲提調能以整暇竣試事在襄陽議復均州襄陽
城門久燬潛度尺寸密爲門夜由水道載入翼日鎖鑰屹然
賊黨駭遁居太常未幾遷通政使司右通政再遷宗人府府
丞遂擢刑部右侍郎加尙書服俸以嬰寒疾乞休卒于官
賜祭葬如例

韓麟趾字昌侯沁水人由舉人知石門縣革耗羨嚴漕糧課
農興學百廢並舉以廉幹稱厯攝德清平湖秀水桐鄉海鹽
五縣洗手而治所在有聲以卓異薦

欽賜蟒服以知州銜知鹽東之歸善旋以病歸值歲歉捐金

糴米以濟鄉里至今人猶頌之

陳昌言字禹前澤州人前明甲戌進士由樂亭知縣擢御史巡按山東順治初以原官用尋視學江南有知人聲以母老乞養歸與弟昌期怡怡泉石間著有述先草及山中斗築居詩集于元己亥進士選庶常有文名

孔斯和澤州人由舉人累官至建甯府知府所至有善政張肇昱亦前明舉人順治初知海甯縣境內多盜請師殲滅之卒于官

衛貞字伯始澤州人丙戌進士除商城知縣縣界吳楚之交明季餘孽伏莽田野荒蕪貞至身入賊巢諭以禍福感泣歸農擢工部主事遷員外郎連出司管權以清白稱改御史巡按江南彈劾大吏之不法者再疏各郡情形爲八弊四害上

之會海寇內犯以論失守從輕被逮已而得釋終于家

崔子明高平人丙戌進士知葉縣蘇軾困興水利弭盜救荒民多賴之遷戶部主事視倉通州以清介著尋卒著有經國大業諸書其從弟光嵩由副貢知溧陽縣歸而讀易賣藥畢振姬與友善沒志其墓

素之鉉字鼎黃陵川人丙戌進士除莊浪知縣以憂歸起補新建所在有政聲祀新建名宦工詩有問素草汾水秋滕王閣等集和元化亦丙戌進士令新鄭有惠政卒于官民祠祀之

王同春字世如沁水人丙戌進士令宣城七年卓有政聲累遷至僉事提學上江江南風氣浮靡百弊叢出設法禁除士習丕變遷四川參議賊亂後人少土荒極力招徠漸有生

聚時餘寇未靖總督李提兵會剿委辦軍餉羣逆悉平尋卒
王度沁水人丙戌進士累官至霸州知州值水災修城賑荒
不遺餘力引疾歸事親孝居鄉以疎財尙義聞

岳峻極字道洋澤州人丁亥進士山縣令累官至吏部驗封
郎中嘗雪臨洮大獄並撫亂民誅其首惡善良多所保全築
張隄以防河患時稱才吏

王用傑陽城人歲貢生順治三年知澄城縣時寇未靖請兵
親勦執賊魁康姬衛戮之餘就撫四境帖然乃修文廟葺衙
署澄邑始復舊焉

趙一心陵川人己丑進士任長山知縣高才絕學在官有治
績以清勤著卒于官著有北征草

韓璵字五城沁水人己丑進士歷官刑部郎出爲僉事兵備

易州出納軍餉三十萬例有羨餘璵用一衡隨解扣除之利
遂絕督治河隄節帑數萬改補桂林奸民與猺獞互揭輒付
火不問爭遂息嘗疏止用兵交趾以弭邊釁轉福建督糧道
以內艱歸

馬麟友字孚吉澤州人舉辛卯鄉試任鹿邑知縣城經闖賊
殘破修復之並築河隄以防泛溢縣正賦舊有沙淤黑窪諸
名民苦賠累爲詳請豁免其他禁淫祠崇學校多以善政及
民甫一年以疾引歸

趙青溥沁水人辛卯舉人由五臺教諭升授常熟知縣訓士
恤民薙奸剔蠹力清漕糧夙弊民以訟至立決皆服其明允
遇事有關風教者皆規畫久遠爲百世計以並賦未完例降
級縣民爭爲籲請更立石表德時以爲有古循吏風

馬如龍字乘六澤州人壬辰進士授略陽知縣廉明公正除
溢額之糧償前官之逋驛馬久爲民害創請官養營弁有內
丁殺人而匿者廉得實以計執之論如律長於鉤距盜悉遠
屏以母老乞養歸所著有貽安堂集

韓張字傑一沁水人乙未進士孝友恬退知桃源縣作官箴
以自警有循惠聲未幾以疾告百姓泣留不得有句云囊憂
民病猶身病今苦盧醫不自醫

王瑞沁水人官江南遊擊己亥六月海寇陷鎮江攻圍江南
淮南諸郡半被脅附瑞相機剿堵屢著奇績進復池太二府
一矢未加地方靜謐士民尸祝之

陳攀龍字雷門澤州人舉順天鄉試授永城知縣大軍南征
供億有則民不知擾縣界礪毫素多盜團集鄉勇多方緝治

地方靜謐以治行第二薦當遷格於吏議尋告歸遂不復出
攀龍幼孤奮志於學十二補諸生讀書嘗就父木主側倦臥
則繫髮於案一夕數起其溺苦若此

尙廷鑑字文藻澤州人以廩貢授樂平教諭勤於課士嘗委
署縣事實心爲民力除驛站積弊卒士民立石頌之

以上澤州府

李國英大同人前明以總兵隸左良玉部下

國朝順治二年來歸隸正紅旗漢軍三年隨肅親王征四川
滅流賊張獻忠授成都總兵尋擢四川巡撫獻忠之滅也餘
黨孫可望劉文秀王命臣等竄踞川南思復逞亂舊將譚文
譚洪譚詣楊展劉惟明等分據川東又與流賊李自成遺黨
邢十萬馬超劉二虎郝搖旗袁宗第李來亨聲援國英先後
迎剿屢降其衆多所斬獲九年可望文秀犯保甯賊衆橫列

十五里勢熾甚國英督兵擄賊中堅別由間道擊其後殲賊數萬溺死者無算先是敘投誠功予二等輕車都尉世職十一年晉銜兵部尙書時成都復爲賊陷重慶夔州嘉定俱附賊國英議先取成都嘉定資其肥饒且屯且守次取重慶以扼咽喉然後乘流東下掃清夔關通荆襄之氣脈徹滇黔之門戶卽爲收服滇黔本計尋加太子太保蔭子入監十四年詔以國英久仕巖疆才猷夙著擢陝西四川總督明年吳三桂等自漢中進征取重慶遂取貴州而譚氏諸軍亦屢爲國英所敗相繼歸降十八年川陝各設總督改國英專轄四川康熙元年明石泉王朱奉鎗煽惑土夷攻敘州諸府國英遣兵勦擒時蜀中餘寇劉二虎郝搖旗等皆聚夔東踞山寨爲四川湖廣陝西銷壤州邑患乃議定合三省會剿國英先招

撫各僞鎮將以散其黨既會三省師同進又分兵大昌大甯截遏奔逃賊不支大潰二虎死生擒搖旗等降其餘黨全川底定國英性廉勤能與士卒同甘苦廬帳牀簣外無長物在蜀大興屯田以牛種數萬給墾者軍儲獲充又疏設學政頒憲綱肅軍政及餘寇蕩平裁定額兵留四萬五千與民休息五年卒得

旨李國英久任巖疆積勞病殞深可憫惻下部議卹

賜祭葬如例謚勤襄七年追敘巫山剿賊功晉爵一等男以其子爛襲爛卒子永陞襲雍正中擢工部尚書以國英入祀賢良祠

鮑承先應州人明季積官至參將從守瀋陽城加都督僉事大兵入廣甯承先隨眾來歸仍授副將屢從入邊有戰功克

城招降懋著勞績天聰八年五月

太宗征大同明總督張宇衡總兵曹文詔等遣鮑韜齋書請和
鮑韜者承先次子也初承先降明人執韜置應州獄至是出
之使來由山徑哈里莊遇土謝經圖濟農兵奪其騎斫韜及
僕從俱死韜復甦莊民留養數日有馮國珮者送韜至大貝
勒營令與承先相見因得覲

上問來使之由遣國珮齋書回以韜創甚留之九年八月大軍
征察哈爾凱旋獲元傳國璽承先奏請

命工部製造寶函誼吉率諸臣郊迎入宮以昭符瑞仍以得
璽之由書勅鈐印頒行滿漢蒙古俾知天命有歸

上是之承先尋同諸臣隨大貝勒等請上

尊號尋允議改天聰十年爲崇德元年先是承先以甯完我

薦入直文館至是改文館爲內三院授承先祕書院大學士
三年更定官制改吏部右參議上書請祖堯舜以行仁宗湯
武以除暴五年以病解任順治元年

世祖章皇帝定鼎燕京

召見賜銀幣鞍馬子世職二年卒

賜祭葬如例承先事繼母孝性簡潔食粗糲衣大布衣第舍
裁蔽風雨居鄉退讓歲歉傾囊賑之又嘗修府縣學創桑乾
河石橋往來者胥頌其德子敬襲世職授河北總兵康熙中
由大同總兵至鑾儀衛鑾儀使

魯明性大同人性果毅習韜略順治初流寇餘黨竄入雲朔
間所至蹂躪明慨然詣軍門陳勦撫策從定應朔山陰懷仁
諸邑以功守備宣府值姜瓖反村堡多煽動明嚴部伍緝奸

充深壘堅壁以待變境內帖然累遷至潼關副將保障邊陲
兵民咸頌其德

高鼎初名山五臺人徙大同姜瓖之變聚眾保五臺山寨尋
歸宣府總兵李延壽積功授參將康熙中累遷至甘肅總兵
官從征吳逆將軍趙良棟檄守風火臺險隘備者勞績賊既
平擢福建興化鎮總兵良棟奏松潘爲西川門戶非鼎不足
彈壓遂改鎮松潘癸亥奉命進剿巴豬寨叛番規度形勢設
疑兵誘戰自引輕騎閒道出王黃六定寨直搗其巢賊驚潰
縱擊大破之斬數百級餘番降在鎮十四年威信大行人民
悅服年七十四屢疏乞歸

聖祖幸大同駐蹕其家

賜匾旌之卒

賜祭葬子麟瑞勇捷有父風以蔭授藍翎侍衛歷川北鎮右營遊擊升參將嘗從征滇蜀累樹戰功保浚康熙間官蘇州知府有賢能聲

全光英大同人官江蘇水師協都司海寇內犯陷崇明進圍江甯光英從總兵梁化鳳率兵擊走之克復崇明以功超擢副將協鎮其地海疆宴然加授騎都尉世職

以上大
同府

麻振揚右衛人家世顯於明所謂東李西麻者也振揚遊擊崑之子有智略順治元年以參將隨豫王征勦潼關歷懷慶甘肅甯波象山副總兵胥有功績後擢江南京口右路總兵軍民安之以老乞歸蔭二子振揚遇族黨有恩誼家居數載

卒

以上朔
平府

石可璋榆社人前明丁丑進士歷任四縣咸有政聲康熙中

祀鄉賢

李長青榆社人家貧樂道好讀書有文名成順治丁亥進士授弋陽令寬厚愛民地方有父母之頌未及一年卒於官時

論惜之

以上遼州

趙三麒字乾符武鄉人由拔貢授桂陽州同知尋署州勦平土賊救被掠男女五百餘人遣各還鄉里攝興甯賊來圍城統鄉兵出不意逆擊大敗之母憂歸起補秦州同知奸僧假造塔斂錢並有挾左道爲民害者捕得悉置諸法調署江都升同州知州並有政績遭父憂服除知橫州爲同官所構被劾歸好學工詩著有相史醫脈繫辭牧同紀略鞞山樹藩浮

槎似園諸集

以上沁州

高丹桂字元香壽陽人順治丙戌進士授工部虞衡司主事

遷員外郎督寶源街道弊多釐剔己丑同考會試有所見輒力言於主者面頸發赤不爲止榜發稱得人遷營繕司郎中勤於其職出爲淮陽兵備道沈靜持大體不爲苛覈而事胥就理云

武全文字藏夫孟縣人幼讀小學卽撰銘題座右丙戌丁亥聯雋成進士授崇信知縣相度洩水疏渠溉田又創渠畔水禮民賴之入爲刑部山西司主事歷湖廣司員外福建司郎中遷按察司僉事備兵平涼甯夏總兵率師過寒甚將入城堅不許而厚犒之遷布政司參議整飭固原兵備艱歸起補山東東兗守道缺裁歸候補侍郎孫光祖薦其才

命賑德安分給有法題補衡永郴守道管蒙古軍草豆以朝正齋表時大軍西征主者知全文饒才略且熟平涼形勢將

用爲參謀而目疾不果還至趙州告歸卒著曠觀園集藏山紀事藏於家

張庭養字範聞孟縣人由貢生任廬陵縣丞不名一錢窘極時輒自哂曰吾洵不失爲清白吏矣卒之曰子孫不能自存廬陵人有張佛子之稱祀名宦

孫剛字彥猷孟縣人舉戊子鄉試授瑞金知縣地鄰閩廣民有蓄蠱者商旅苦之剛設法禁止令五家相坐後遂絕嘗捐俸蓄馬數十騎遇有供億事立辦而民不知擾致仕歸尋卒

以上平定州

崔德爲忻州人順治初由副貢授考城知縣首革船丁陋規時餘寇未靖軍事絡繹籌備有方士民安堵相與立石紀德解組後家居四十年閉關卻掃時論高之

史三榮忻州人丙戌進士除東阿縣明敏有爲縣人刻石紀

其德政比之羊叔子云

忻州以上

王公維字元輔五臺人父子翰由貢生宰禹城縣有賢聲公維以諸生教授鄉里明季

大兵入塞編入伍隸漢軍旗籍順治初授江甯知縣以廉幹稱擢戶部主事遷兵部員外郎再遷吏部考功司郎中晉三品秩恪恭練事甚著賢聲蔚州魏敏果公象樞極推重之初公維被略其妻某氏與相失恐受辱遂自殺以烈著

王運元五臺人由拔貢選海陽知縣時八旗兵駐潮州運元慮軍民雜處不相安建營房以駐兵與居民隔別兵民皆歡悅鄭成功屢入犯沿海奸民接濟米糧

朝廷因有徙界之令時運元方入關分校比出關而海陽五

都已議定畫界內徙期限嚴急人心惶惶將生變運元力請寬限民遂安帖先是縣中差徭按戶科派民多轉徙流離運元執糧冊爲定用是役均而貧民皆歸業在任十年境內大治內遷戶部主事未任染瘴而卒

徐騰芳字蘭臺五臺人戊子武舉沈毅闊達多力善拳勇姜瓖之亂土寇蠭起所至剽掠獨騰芳所居不敢犯選六安衛千總升廬州守備時三藩相繼叛大軍南征半取道於淮肥騰芳和輯兵民彈壓地方護送儲侍事應機立辦民不知兵當事倚之如左右手以勞瘁咯血成疾卒於任

以上代州

李肯字元仲解州人前明戊午舉人雄偉有岸略聲如洪鐘初知孟縣調良鄉擢山海道

國初起濟甯道關變後賊猶未盡平肯勵將士擒獲輒盡法

治之賊忿甚一日伺皆出伏黨數十人於路猝出擊之左右
胥駭散因被執脅以利刃不爲動大罵不屈遂遇害事聞
贈光祿寺卿蔭子樞入監

張愼學夏縣人前明丁未進士歷宰中牟元氏順治初授長
蘆巡鹽御史商民均惠繼巡蘇松等郡擒治巨寇按視畿南
北糾劾貪殘申理冤抑鈎稽案牘晝夜勞瘁卒於官子宿焜
由諸生任四川南充知縣遷潮州府同知並祀名宦

馬迪吉夏縣人寄籍運城前明壬午舉人順治初任鄧州知
州有惠政巨寇劉二虎圍州城迪吉率兵民巡守七十餘日
城中殺牛畜爲食撤屋爲薪諭以大義人皆感泣無異志以
功遷順天府治中尋卒祀鄧州名宦

丁期昌字厯初安邑人前明癸未進士順治初授揚州推官

調黃州精律例多所平反舉廉官第一尋以吳直指蜚語罷
歸教子弟讀書三十年不出門外衣大布衣食脫粟飯周貧
乏無德色鄉人重之著評注唐詩藏於家

郭連城號笑瀛平陸人弱冠登鄉薦酷嗜古學爲孝廉二十
年捷南宮房師倪鴻寶極賞之授江南太平司李分校棘闈
所得皆知名士因剛介忤直指遂坐貶不得出順治二年起
廢門人居銓諫者議補部員力辭養親間居著述人甚重之
王鳳林芮城人莊毅公孫以蔭任後軍都督府經歷順治初
以人材薦授刑部主事歷員外郎中出知青州府除大蠹修
郡學清逃人獄豁無辜二百餘人撫按交薦當超擢會以積
勞卒於官

謝象申安邑人舉戊子鄉試任臨縣教諭擢潮陽知縣海寇

國城率兵捍禦屢出奇擊走之自是不敢輕犯邑人爲立碑紀功弟象超亦戊子舉人令清澗母憂歸起補沙縣知縣政聲茂著遇士有禮訓之如子弟閩人稱爲循吏祀名宦

常貞吉字豫三解州舉人任長泰知縣以廉能膺卓薦耿逆之變力拒僞職歸里後講學著書以終

馬光啟安邑人壬辰進士性敦厚攻苦力學由潞安府教授累擢戶部員外郎所在有聲

劉迪穀安邑人戊戌進士除太和知縣再補岢縣天性剛直兩司民牧俱以清著

周訓成安邑人己亥進士選庶吉士累官江西南瑞道改廣西右江兵備尋督江南糧道俱有惠聲致政歸著有見山園草

侯世忠夏縣舉人由教授升鄖縣知縣正直清廉聽訟明斷
平易近人卒於官旅櫬不能歸上官資送之鄉里多稱其賢
謝樞齡安邑人辛丑進士授雄縣知縣剔除官價陋規勤課
諸生親履隴畝問民疾苦行取補內閣中書父憂歸服除授
思明府同知以苗民雜處扶弱鋤強委驗交趾貢物沒於王
事得馳驛歸喪

張鵬翥運學貢生由教諭升新化知縣歷任邠陽臨武操守
廉潔所至有聲攝衡州府篆值大軍靖苗逆辦理軍餉晝夜
勤勞沒於軍營

以上
解州

任芳字蘭馨稷山人順治初徵授汝州知州亂後城邑殘破
民多流亡芳日居草萊中盡心撫綏生聚漸盛以事忤上官
遂辭歸汝人思之祀之前牧劉公祠立石紀之

王體言字岷耕聞喜人丙戌進士除隴西知縣邑當衝要差徭浩繁下車力陳民疲敝狀盡裁冗費撫回民得其歡心五年河西回叛陷蘭岷臨洮進圍鞏昌體言協太守力禦之晝夜登陴城回欲應賊素感其惠不忍害遂棄家走會援師敗賊城外體言率丁壯乘勢夜擊之賊乃潰散解組歸開戶讀書疏布自若與修邑志數延鄉飲賓皆弗就嘗自言生平多質少文甯直勿曲一切依阿跼蹐態不惟不屑爲亦不能爲識者避之

任振鷺聞喜人由副貢任洋縣丞遷臨漳知縣下車盡革陋規勒石公署漳水驛城每漲溢多漂沒屋舍築隄衛之民感戴爲建祠祀焉擢邠州知州亦多政績

張其郁垣曲人順治初由貢生授餘干知縣時土寇就撫奸

民多告訐者其郁懲之胥置不問授兵頗桀驚繩以法子女
繫營中者立遣之前令屢被賊害其郁出入賊巢至再賊感
其誠胥投戈爲良民歲饑曲賑之全活者衆一載罷歸家居
敦行誼親故時賴以舉火

任宏祚字昌祉河津人辛卯舉於鄉事母董以孝著任應州
學正十年遷漢川知縣康熙戊辰武昌裁兵煽變夜駕小舟
至彝陵乞師身任餽餉并請署兵爲前鋒賊望風披靡縛僞
官致轅門斬之不妄殺一人將軍史蔡繼統兵至胥飽騰去
總鎮嚴奇其才邀參帷幄浹旬江漢盡平以疾請致仕漢川
士民立石頌之

吉鳴謙字正之絳縣人順治甲午舉於鄉宰夏津興學勸農
政教大行康熙甲子入闈分校得士顏光敏孔興祥皆聖裔

知名者也相傳其入闕前夢孔子與顏子列坐而已侍側及入闕復夢之語同事以爲異榜發果有二士一時咸以爲精誠所感云

袁綱字尙之河津舉人少孤事母以孝聞由汾州教授升安陸知縣地瘠民貧徭役苦累下車極力剔釐未期年諸弊悉清引疾歸邑民立碑頌之

王振亨字乾二稷山人乙未進士除宜興知縣縣故劇邑兵後災傷相仍人民流徙震亨設法招徠墾土寬徭申蠲荒糧清隱漏破詭寄豪蠶敷迹民困以蘇時張三朱撻生揭竿稱亂率兵剽滅居民安堵尤加意學校待士以禮而梗化則嚴懲之士風丕變城郭廨宇多所修輯而民不知役職滿告歸士民爲著循卓彙言以紀其政績

張鳳翼字天翔絳州人丁酉魁於鄉由保德州學正遷延長知縣潔已愛物吏畏民懷

趙世福字魯齋絳州人丁酉舉於鄉歷沁忻二州學正遷星子知縣兼管南康九江二衛屯田事務均徭役修城垣嚴禁溺女興復白鹿洞躬課諸生優其廩給

甯世琰聞喜入戊戌進士授遂平知縣革除陋例招集流亡三千餘戶民多懷之再補武邑追償兵占民田八百餘頃作勸民五則刊布鄉邑廣立社學以教之遷內閣中書以同知用卒於家世琰特躬整肅嗜學能文與兄世珽齊名時稱二難

楊綸字王言聞喜人已亥進士授武安知縣明季凋敝之餘爲治以興教化厚民生爲務勸學課農力行實政士民德之

爲建祠以祀

陳所抱絳縣人已亥進士除長武令爲政務先教化謹庠序課農桑孜孜講求邑以大治擢淮安同知士民泣送至百里外到官釐奸剔弊力雪冤獄民愛之如長武

閻調鼎字伯梅絳州人已亥進士授江甯府推官清正廉明政績丕著裁缺歸里披覽典籍後學多所造就焉

柴勝任河津人辛丑進士除雒川令勸學課農不以刑威加民雒俗不知女紅勝任教之織遂擅機杼之利移知涉縣開渠灌田至今賴之擢普安州未任卒

趙憲鼎字則九戊戌進士授懷遠知縣亂後百姓流移田野荒蕪前令希上官意虛報開墾民大困憲鼎至卽攜牒親謁當道哭陳百姓流散貽累不堪狀當道色動遂題准豁免民

獲更生解組歸編摩圖史優游以終

安洪嗣垣曲副貢授臨淮知縣縣遭獻賊蹂躪多無主荒田
洪嗣蒞任招民復業田漸開闢同知鮑宏仁行縣至欲援以
爲功以洪嗣報墾數少虛報田七百三十七頃有奇部議以
事由宏仁得優叙時洪嗣已罷官去之曰士民感德

周天成字凝圖閬喜人由舉儀衛歷刑部啟心郎進工部侍
郎調司吏院隨掌織造蘇杭江甯會海寇內犯直逼金陵協
同督撫調度禦防城賴以全事平復捐俸贖京口瓜儀被掠
男女萬餘人解組歸以驛傳苦累復稷絳協馬以均勞逸其

他義舉甚多鄉里欽之

絳州以上

賀樞蒲縣人前明丁卯舉人知阜平縣行取刑部主事由員
外郎郎中轉貴州道監察御史巡視西城章疏侃侃人稱鐵

面御史出按山東風采凜然貪墨吏胥斂迹甫兩月疾卒幾無以爲斂同官出俸錢賻之乃克反櫬

李呈祥字麟楚隰州人前明庚午舉人壽陽教諭遷延津知縣調陳留入爲兵部郎遷順廣兵備道

國初以薦歷分守大梁道集河隄數百里開陳橋舊河直南路至今便之遷分巡武昌道招撫劇盜民獲安堵調天津卻規例不受內升通政司通政使尋擢督捕侍郎改戶部總督倉場嚴禁苞苴運弁旗丁胥頌之復以工部侍郎督

皇陵大工力爲撙節功垂竣以病請未至家卒呈祥自校官至大僚胥有廉聲在工部應

詔陳言指畿輔利病尤中肯綮云

劉餘澤字惠寰隰州人以歲貢歷太原訓導樂平教諭擢文

安縣令理繁治劇綽有政績歸田後清貧如昔耕讀課子孫
州人推重之

牛友月字桂如隰州人歲貢由遼州學官擢長清知縣鎮服
豪強吏畏民懷縣人立祠祀之

冀亦式蒲縣人由恩貢授通判改樂安縣丞遷蘇州府同知
蒞任三載清正嚴明兵民安堵致仕歸約束子弟和睦族黨
邑人咸推重之

李附鳳永和人由貢歷新鄉邢臺縣丞勤敏廉能用薦擢狄
道知縣革減火耗勤課士子有神君嚴師之謠

路義秉永和人恩貢任遼州學正代攝州事己丑寇起計擒
僞官救知州張道南恢復城垣遷運司教授諸生某爲盜所
誣力辨其枉官至西城兵馬司以上隰州

劉復鼎字玉璣趙城人少好學以進士授漳浦令值寇至招集丁壯堅守三攻三卻之後引疾歸里居二十餘年卒

劉時俊趙城舉人官建昌知縣實心實政民愛戴之撫按交章薦力辭歸里潛心理學一時知名士皆從之遊以上霍州

右順治年一百六十四人

又十人附見